

Ammasumik ataatsimiinnermi oqaluuserisassat:

**Imm. 01 Oqaluuserisassat akuersissutigineri**

**Imm. 02 Maniitsumi arsaattarfik ivigaaraasalik.**

**Imm. 03 Tamalaat**

Ataatsimiinneq aallartippoq nal. 13.14

*Peqataasut:*

***Partii Naleraq***

Malene Ingemann - Sisimiut

***Inuit Ataqaatigiit***

Dorthe Sofie R. Olsen - Maniitsoq

***Siumut***

Frederik Olsen - Sisimiut

Karl Lyberth - Maniitsoq

***Nalunaaruteqarlutik peqataannngitsut:***

Emilie Olsen - Sisimiut

Anna Karen Hoffmann - Kangerlussuaq

**Imm. 01 Oqaluuserisassat akuersissutigineri**

Akuersissutigineqarput.

**Imm. 02 Maniitsumi arsaattarfik ivigaaraasalik.**

*Journalnr. 06.02.01*

Tunuliaqutaq

Kommunalbestyrelsip 2017-imi oktobarip 26-ani ataatsimiinnermini, Maniitsumi arsaattarfiup ivigaaraasalersorneqarnissaanut immikkut aningaasaliissutissat eqqartorpai. Tamanna sioqqullugu suliaq Teknikkeqarnermut, Aatsitassarsiornermut Avatangiisinullu ataatsimiititaliamit 2017-imi oktobarip qulingani eqqartorneqarpoq.

Arsaattarfiit angissusissaannut tunngatillugu siunissami piumasaqaataasussat pillugit Kalaallit Nunaanni Arsaattartut Kattuffianit (KAK) nalunaarutigineqartut assigiinngitsut patsisaallutik, suliaq Teknikkeqarnermut, Aatsitassarsiornermut Avatangiisinullu ataatsimiititaliamut utertinneqaqqippoq.

Maleruagassatigut tunngavissat

GBU unammersuarnermi malittarisassat.

Arsaattarfiit angissusissaannut tunngatillugu, kommunimi malittarisassaqaangilaq.

Pissutsit atuuttut

Teknikkeqarnermut, Aatsitassarsiornermut Avatangiisinullu ataatsimiititaliap suliamik suliarinninnissaanut atatillugu, siunissami arsaattarfiit Kalaallit Nunaanni pissartannorniunnerni atorqearsinnaanissaanni angissusissaannut tunngatillugu piumasaqaataasussat pillugit, allaffeqarfik KAK-mit oqaaseqaammik noqqaavoq. Allakkami 2017-imi septembarip arfernganeersumi (ilanngussaq 1) siulittaasuugallartup Gert Fleischer-ip paasissutissiissutigaa, Kalaallit Nunaanni pissartannorniunnissanut arsaattarfiit angissusissaattut piumasaqaatigineqartussaq 68 x 105 meteriussasoq (FIFA--p piumasaqaataatut angitigisoq). Paasissutissiissut taanna Teknikkeqarnermut, Aatsitassarsiornermut Avatangiisinullu ataatsimiititaliamut aamma Kommunalbestyrelsimut suliamik saqqummiussinermi ilanngunneqarpoq.

Malitsigisaanik KAK nutaamik siulittaasortarpoq, kommunalbestyrelsillu suliamik suliarinninnissaa sioqqullugu, kommunalbestyrelsimut ilaasortap Hans Frederik Olsen-ip, siulittaasunngortoq John Thorsen oqaaseqaasioqqusimallugu. Tassani John Thorsen-ip paasissutissiissutigaa, nunat tamalaat akornanni pissartannorniuttoqarnissaani angissutsit piumasaqaataasoq FIFA-p piumasaqaataatut angitigissasoq, kisiannili Kalaallit Nunaata iluani unammersuarnermut, matumani Kalaallit Nunaanni pissartannorniunnissanut tunngatillugu piumasaqaataassanngitsoq. Arsaattarfiit angissusissaannut tunngatillugu piumasaqaataasussat pillugit KAK takussutissiaqarpoq (ilanngussaq 2). Maniitsumi arsaattarfik qaartiterisoqarani 56 x 100 meterinngorsinnaavoq, taamaattumillu Kalaallit Nunaanni pissartannorniunnissani arsaaffigineqarsinnaassalluni, soorlu tamanna John Thorsen-ip maileruteqarnermini uppernarsaraa.

*Arsaattarfiup angissusissaa pillugu innuttaasut isumaasa tusarnissaat siunertaralugu, atuarfiup inersuaani 2017-imi novembarip qulinngiluaani innuttaasunik ataatsimiisitsisoqarpoq. Takkussimasunut 40 missaaniittunut arsaattarfiit angissusissaannut periarfissat marluk TAAA-mi ilaasortanit saqqummiunneqarput. Ataatsimiinnermi oqallinnerup takutippaa, amerlanerussuteqartut FIFA-angissusissaatut angitigisumik arsaattarfittaarusuttut.*

*Nunatsinni arsaattarfiit ivigaaraasut allat angissusaat pillugit kiisalu Maniitsumi Nunatsinni pissartannorniuttarsimanerit pillugit oqaluttuassartaani sunngiffimmi inspektøri paasissutissanik pissarsinikuvoq. Naatsorsuinerit takutippaa, Illoqqortoormiut eqqaassanngikkaanni, arsaattarfiit*

*tamarmik FIFA-angissusissaatut 68 x 105 m-iusumut angissuseqartut imaluunniit angissusaat qanittuararsuusoq, taamaattorli Nanortalimmi aatsaat 2018-imi allineqassalluni. Maniitsumi arsaattarfiup oqaluttuassartaa eqqarsaatigalugu, 1987-imi 1997-imilu angutit inersimasut unammersuarnikuupput aammalu 2010-mi inuusuttut. Taakku saniatigut arsaattarfimmi Nunatsinni unammersuarnissanut anngunniunnerit arlallit ingerlanneqarnikuupput.*

### Atuilluartuunissakkut kingunerisinnaasai

#### Aningaasaqarnikkut allaffissornikkullu kingunerisinnaasai

Qaartiterisoqarani arsaattarfiup anginerpaaffigisinnaasaani ivigaaraasalersuisitsinissamut, 2.543.000 koruuninik immikkut aningaasaliissuteqartoqarnissaa pisariaqarpoq.

Angissusissatut FIFA-p piumasaqaataa naapertorlugu arsaattarfiup ivigaaraasalersorneqarnissaanut, 9.594.000 koruuninik immikkut aningaasaliissuteqartoqarnissaa pisariaqarpoq.

Qaartiterisoqarani arsaattarfik minnerusoq ivigaaraasalersorneqassasoq toqqarneqassappat, siunissami KAK-p piumasaqaatini allanngortissagaluarpagit arsaattarfik allilerneqarsinnaassaaq.

#### Qullersaqarfiup oqaaseqaatai

Oqaaseseqaatissaqanngilaq.

#### Allaffeqarfiup naliliinera

Nunap iluani unammersuarnissani arsaattarfiit angissusissaannut tunngatillugu KAK kisimi piumasaqaasiortarpoq. Piumasaqaatit qanoq ittuussanersut KAK-mi isummat assigiissimanngitsut paasinarsivoq, Kalaallit Nunaannili pissartanngorniuttoqarnissaanut arsaattarfiit FIFA-p piumasaqaataattut angitiginissaannik massakkut siulersuisut piumasaqaatiginngilaat.

### **Innersuussut**

Teknikkeqarnermut, Aatsitassarsiornermut Avatangiisinullu ataatsimiititaliamut, Aningaasaqarnermut ataatsimiititaliamut, Kommunalbestyrelsimullu innersuussutigineqarpoq, tulliuttumi toqqaaqqullugit:

1. 2.543.000 koruuninik immikkut aningaasaliissuteqarluni arsaattarfimmik 56 x 100 meterimik pilersitsisoqassasoq.
2. 9.594.000 koruuninik immikkut aningaasaliissuteqartoqarluni, FIFA-p piumasaqaataanut naapertuuttumik arsaattarfimmik 68 x 105 meterimik pilersitsisoqassasoq.

### **Aalajangiineq**

Innuttaasut kissaataat 68 x 105 meterimik pilersaarussiaq akuersissutigineqarpoq.

KAK radio-kkut ippassaq apersorneqarluni ivigaaraasanik arsaattarfiit pillugit tapiffigineqarsinnaanneranut periarfissaq ujartorneqassaaq.

Nunniornissamut pilersaarussiaq titartaganngorlugu ilanngunneqarnissaa kissaatigineqarpoq.

Akikinnerusumik qaartinneqarsinnaanera misissoqquneqassasoq ataatsimiititaliap kissaatigivaa.

Malene Ingemann siunnersuut 1 akuerivaa ikinnerussuteqarluni siunnersuut 2 akuerinngilaa.

### **Ilanngussat**

1. Gert Fleischer-imit allakkat 2017-imi septembarip arfernganeersut
2. John Thorsen-imit allakkat 2017-imi oktobarip 25-aneersut
3. Arsaattarfiit allat angissusaat oqaluttuassartarlu



**Imm. 03 Tamalaat.**

Karl Lyberth – Maniitsoq.

Maniitsumi majuartaatip ullumikkut killiffianut apeqquiteqaat.

Ole Thor – Maniitsoq

Siunnersortip napparsimanagera peqqutaalluni majuartaat kinguaattoorpoq.

Ataatsimiinneq naammassivoq nal.14.19